



Huw Irranca-Davies AS
Cadeirydd
Y Pwyllgor Deddfwriaeth, Cyfiawnder a'r Cyfansoddiad
Senedd Cymru

SeneddDCC@senedd.cymru

31 Mawrth 2022

Annwyl Huw

Y Cytundeb Cysylltiadau Rhyng-sefydliadol: Y Pwyllgor Sefydlog Rhyngweinidogol

Yn dilyn fy llythyr dyddiedig 18 Mawrth a'ch llythyr chithau dyddiedig 22 Mawrth cyn cyfarfod cyntaf y Pwyllgor Sefydlog Rhyngweinidogol ar 23 Mawrth, rwyf wedi cyhoeddi Datganiad Gweinidogol Ysgrifenedig sy'n crynhoi trafodaethau'r cyfarfod. Mae wedi'i gyhoeddi yn: [Datganiad Ysgrifenedig: Y Pwyllgor Sefydlog Rhyngweinidogol \(31 Mawrth 2022\) | LLYW.CYMRU](#)

Cafodd eich llythyr ei nodi gan Gadeirydd y Pwyllgor Sefydlog Rhyngweinidogol, yr Ysgrifennydd Gwladol dros Ffyniant Bro, Michael Gove AS. Yn ogystal, tynnais sylw'r Cadeirydd yn benodol at safbwynt y Pwyllgor ynglŷn â Biliau'r DU a chydysniad deddfwriaethol.

Yn eich llythyr rydych yn cyfeirio at y peirianwaith newydd, gan gynnwys Grwpiau Rhyngweinidogol, a Biliau'r DU a chydysniad deddfwriaethol. Rhoddaf sylw i bob pwynt yn eu tro isod.

Nid yw dull gweithredu Llywodraeth y DU o ran y Bil Cymwysterau Proffesiynol yn parchu Confensiwn Sewel ac nid oes cyfiawnhad o gwbl drosto o ystyried nad oes amgylchiadau eithriadol yma. I gynnal ymddiriedaeth rhwng Llywodraeth y DU a llywodraethau eraill y Deyrnas Unedig, rhaid parchu Confensiwn Sewel. Mae gan y prosesau rhynglywodraethol newydd y potensial i gyflawni gwelliannau sylweddol, mawr eu hangen, i'r ffordd y mae Llywodraeth y DU a'r llywodraethau datganoledig yn gweithio gyda'i gilydd. I ni, y prawf yw a fydd Llywodraeth y DU yn cadw'n gyson at ysbryd a sylwedd y diwygiadau – ar sail parch, cyfranogi cydradd a dyhead i ddod i gytundeb drwy drafod a chyfaddawdu, nid drwy orfodi.

Rydym yn rhannu siom y Pwyllgor ynglŷn â'r byr rybudd am gyfarfod cyntaf y Grŵp Rhyngweinidogol ar Gysylltiadau'r DU a'r UE, ac rydym yn disgwyl i gyfarfodydd Grŵp Rhyngweinidogol yn y dyfodol gael eu trefnu yn unol â'r egwyddorion Cysylltiadau

Bae Caerdydd • Cardiff Bay
Caerdydd • Cardiff
CF99 1SN

Canolfan Cyswllt Cyntaf / First Point of Contact Centre:
0300 0604400

Gohebiaeth.Mark.Drakeford@llyw.cymru
Correspondence.Mark.Drakeford@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Rhynglywodraethol. Mae disgwyl i gyfarfod nesaf y Grŵp Rhyngweinidogol gael ei gynnal cyn cyfarfod nesaf Cyngor Partneriaeth y DU a'r UE, nad oes dyddiad arfaethedig ar ei gyfer ar hyn o bryd, ond byddwn yn parhau i roi'r wybodaeth ddiweddaraf i'r Pwyllgor yn unol â'r Cytundeb Cysylltiadau Rhyng-sefydliadol.

Mae'r Bil Gwrthrychau Diwylliannol (Gwarchodaeth rhag Ymafael) yn enghraifft amlwg o'r heriau a achosir pan fo darpariaethau a gwybodaeth yn cael eu rhannu'n hwyr. Roedd ein hamcanion polisi yn gyson mewn perthynas â'r Bil hwn, ond nid oedd digon o amser ar gael i drafod yr amddiffyniadau priodol ar gyfer datganoli, ac i gytuno arnynt. O ganlyniad, datgymhwysodd Llywodraeth y DU ddarpariaethau mewn perthynas â Chymru. Nid wyf yn credu bod methiant yn y cyfathrebu yn ddisgrifiad teg o'r canlyniad yn yr achos hwn. Mae ein safbwynt polisi yn glir. Nid oedd Llywodraeth y DU yn fodlon rhoi'r sicrwydd angenrheidiol, a heb y sicrwydd hwnnw, nid oedd Llywodraeth Cymru yn fodlon cael ei chynnwys yn y Bil. Croesawn ymrwymïadau Llywodraeth y DU ar gyfer mwy o ymgysylltu cynnar yn y sesiwn Seneddol nesaf. Os cedwir at hyn, bydd yn lleddfu'r pwysau. Serch hynny, rydym yn parhau i bwysu am drafodaethau sylweddol ar ein hegwyddorion ar gyfer Biliau'r DU a fyddai'n helpu ymhellach i wella gweithio rhynglywodraethol.

Er ein bod yn croesawu'r datblygiadau hyn, rydym yn parhau i gredu mai rhoi Confensiwn Sewel ar sail statudol a thraddodadwy yw'r ffordd fwyaf priodol o hyd o ddiogelu'r setliad datganoli a'r Deyrnas Unedig.

Rwyf innau'n anfon copi o'r llythyr hwn at Mick Antoniw AS, y Cwnsler Cyffredinol a Gweinidog y Cyfansoddiad, y Gwir Anrh Elin Jones AS, y Llywydd; y Gwir Anrh Michael Gove AS, yr Ysgrifennydd Gwladol dros Ffyniant Bro, Tai a Chymunedau a'r Gweinidog Cysylltiadau Rhynglywodraethol; Pwyllgor Swyddfa Weithredol Cynulliad Gogledd Iwerddon, Pwyllgor Cyfansoddiad, Ewrop, Materion Allanol a Diwylliant Senedd yr Alban, Pwyllgor Cyfansoddiad Tŷ'r Arglwyddi, a Phwyllgor Dethol Tŷ'r Cyffredin ar Weinyddiaeth Gyhoeddus a Materion Cyfansoddiadol.

Yn gywir



MARK DRAKEFORD